

АКАФИСТ СВЯТЫМ РАВНОАПОСТОЛЬНЫМ ЦАРЕМ КОНСТАНТИНУ И ЕЛЕНЕ

Кондак 1

Избранныи предвечным Царем, святии равноапостольнии Константине и Елено, на всемирное воздвижение Животворящаго и Спасительнаго Креста Господня, имже соделася спасение рода человеческого, искупленнаго кровию пригвожденнаго на нем Агнца Божия, да вси праведнии и грешнии благодарственно взывают вам: Радуйтесь, святии равноапостольнии Константине и Елено, обретшии Крест Господень, оружие спасительное.

Икос 1

Ангельский собор на землю зрети велие чудо — како обретесе Святое Древо, на много лет в недрах земли бездушным камением хранимое, ныне же руками архиерейскими возносимое, людие же видеша сие, ниц на землю падоху, слезно вопия: “Господи помилуй! Господи помилуй! Господи помилуй!” Вас же, святии равноапостольнии Константине и Елено, смиренно величаху: Радуйся, блаженная мати зело возлюбившая Христа; радуйся, боговенчаный сыне, слуго Небеснаго Царя. Радуйтесь, земнии Ангели и небеснии человецы; радуйтесь, строителие тайн Божиих. Радуйтесь, яко вами небо и земля духовно возрадовашася; радуйтесь, яко от всех земнородных вкупе прославишася. Радуйтесь, достойнии носителие имене Христова; радуйтесь, два светила великая во вселенней. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 2

Видев славный Константин во время брани с Максентием в полудни Крест на небе, светом сияющий, и письма “Сим побеждай”, повеле оковати все оружие и шлемы бранные, да до конца победив врага помощью Крестною, воспоют распятому Христу победную песнь: Аллилуиа.

Икос 2

Разум твой, не просвещен еще святым Крещением, царю Константине, просвети Господь во сне нощию, научая победити врага Крестным знамением, мы же дивяся таковому Промыслу Божию о Тебе, взываем сице: Радуйся, двукратным видением Креста свыше озаренный; радуйся, паче всех царей земных превознесенный. Радуйся, свыше предызбранный на апостольское служение; радуйся, победителю врагов видимых и невидимых. Радуйся, Крест Господень зело прославивый; радуйся, Церкви Христианской вся силы отдавый. Радуйся, врага спасения человеческого посрамивый; радуйся, честным Крестом главу его

сокрушивый. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 3

Силою Креста во брани, ведал еси богомудре Константине: “Аз спа-сох град сей от врагов, и сердце мое уязвлено любовию распятого Христа, Егоже чту, Емуже поклоняюся и не возбраняю любящим Его пети блаженную песнь: Аллилуиа”.

Икос 3

Имея в сердцах чувство живыя христианския веры, великий Константин повеле, да сокрушатся идолы и да созиждутся храмы, идеже сонмы Ангелов и лики праведных выну молят своего Создателя. Мы же недостойнии, просяще о мире мира и добром ответе на страшнем судище Христове, зовем вам: Радуйтесь, первии во христианах царие; радуйтесь, милосердием и властью украшеннии. Радуйтесь, любовию и правдою одеянии; радуйтесь, от вражиих прелести избавленнии. Радуйтесь, уставов церковных хранителие; радуйтесь, девства и целомудрия любителие. Радуйтесь, языческие храмы на земли упразднившии; радуйтесь, день Воскресный праздновати установившии. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 4

Бурныя потоки христианския крови твоим повелением, святой Константине, прияша конец; сущии в темницах получиша ослабу, крьющиися во пещерах и горах вспять возвращахуся, и чада церкви лобзанием святым во объятии встречаху друг друга, воспевая Богу песнь хвалы: Аллилуиа.

Икос 4

Слышавше мученицы и страдальцы Христовы повеление твое, богоблаженне Константине, да свободно исповедают веру Христову, возвеселишася и со слезами радости воспеваху ти сице: Радуйся, великаго Рима украшение; радуйся, узников Христовых свобожделение. Радуйся, языческаго мира упразднение; радуйся, идолов и кумиров сокрушение. Радуйся, прав и законов утверждение; радуйся, чар волшебных и гаданий карательное запрещение. Радуйся, о Церкви пекийся, аки чадолюбивая мати; радуйся, воспретивый осужденных на кресты распятие. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 5

Воскресение Христово видевше, воспеваху людие: Се Крест, имже прииде радость всему миру. Неведомо бысть миру оружие, имже новый Давид победи

смерть, сокрыто бысть от поклонения верных людей, Ангелы токмо охраняху честный Крест, немолчно воспевая: Аллилуиа.

Икос 5

Видя осмидесятилетняя старица, богомудрая мати Елено, сердце твое, пречудне царю Константине, желанием исполнено к прославлению Святаго Древа, сама со тщанием приемлет труды, да открывает сокровище на поклонение всем языком, с любовию зовущих вам таковая: Радуйтесь, святии равноапостольнии Константине и Елено, царице премудрии; радуйтесь, двоице святая, Богом возлюбленная. Радуйтесь, любовию к Нему аки Серафими пламеневшии; радуйтесь, ревностию аки апостолы послужившии. Радуйтесь, усердием вашим яко жены с мираы пришедшии; радуйтесь, за подвиги ваша от всех земнородных славимые. Радуйтесь, яко Ангелы с вами ликують на небеси; радуйтесь, яко человецы выну восхваляют вас на земли. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 6

Проповедником тайны, идеже бе треблаженное Древо, бысть некий Иуда, иже не хоте указати место сие, сего ради изнурен бысть гладом во глубине кладенца по повелению святой царицы Елены, ейже Дух Святой откры, да употребит всякое усилие для взыскания Креста Господня на радость православным христианом, поющим Богу: Аллилуиа.

Икос 6

Возсия лучь Божественнаго света в сердца Иуды, непреклоннаго доселе к прошениям и увещаниям богомудрой царицы Елены, иже отверз уста глаголаше: “Близ Голгофы, в капище Венеры, обрящете Крест вашего Христа”. Оттоле начаша искати, многи труды понесоша, не обретше же сокровища, зело изнемогша. Егда же ощутиша велие благоухание из недр земли, усугубиша труды и обретоша три креста, тогда вернии людие прославляху вас со слезами: Радуйтесь, треблаженнаго Древа усердные искателие; радуйтесь, дела апостольскаго неленостные продолжателие. Радуйтесь, торжество веры Православныя явившии; радуйтесь, люди, чтущии Крест Господень, зело возвеселившии. Радуйтесь, воздух животворным знамением освятившии; радуйтесь, обретением Креста оставившии людем память вечную. Радуйтесь, принесшии всему миру радость безконечную. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 7

Хотя тщательно уведети Крест, на немже принесется Жертва Святая, да не воздадут честь Креста иному, блаженный патриарх Макарий повеле возложить кресты на болящу и мертва, сии же ожиша и здрави бяху, тогда людие, видевше

чудо, падоху ниц до земли, Животворящему Кресту, победителю смерти и ада, поюще: Аллилуиа.

Икос 7

Новый христианский храм созидает мудрая царица Елена на Голгофе для всемирнаго воздвижения Животворящаго Креста Господня, безчисленное же множество людей молиша блаженнаго патриарха Макария, да сподобятся узрети Господень Крест. Он же, смирения сый исполнен, с освященным собором высоко подъяша Крест, да видят вси, зряще сие, племена и языцы с благоговением и радостию восклицаху: Радуйся, Треблаженное Древо, имже спасесе двоица перевозданная; радуйся, Честное Древо, имже ад испустиша узники. Радуйся, Честное Древо, Архангелами и Ангелами хранимое; радуйся, Честное Древо, пророками богоглаголивими предзримое. Радуйся, Честное Древо, преподобных и праведных веселие; радуйся, Честное Древо, кающихся грешников надежду и спасение. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 8

Странствующему на земли нашего ради спасения, Иже не имеяше где главы подклонити, воздвигоша храмы, богомудрии Константине и Елено, в Вифлееме рождшемуся, на Голгофе, идеже распяты, на горе Елеон, отнюдуже вознесша к безначальному Отцу, и у дуба Мамврийска, идеже Авраам пригласи Его странна, да вси вернии непрестанно поют Серафимскую песнь: Аллилуиа.

Икос 8

Все ваше служение бысть во славу Сладчайшаго Господа и Его Пречистыя Матере, Заступницы мира. Кий язык изречет подъятыя вами труды? Кий разум постигнет радость, егда обретесе вами желаемый Крест Господень? Сего ради вси земнороднии благодарно взывают вам: Радуйтесь, Ангельскою чистотою пожившии; радуйтесь, всем сердцем Господа возлюбившии. Радуйтесь, апостольскою ревностию потрудившиися; радуйтесь, христианским смирением украсившиися. Радуйтесь, вся добродетели в себе совокупившии; радуйтесь, блаженство райское унаследовавшии. Радуйтесь, яко зрите всегда Творца и Господа; радуйтесь, яко мзда ваша многа на небесех. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 9

Всякое еретическое учение отвергше, богомудрии отцы и учителяе, собравшиися повелением твоим, царю Константине, на первом Вселенском соборе, Ария отгнаша и его пособников, и яко гром возгремеше во вся концы песнь: Аллилуиа.

Икос 9

Ветии сладковещаннии богоноснии отцы, святители и учителя на соборе Никейстем, Николай Мирликийский, Спиридон Тримифунтский, Пафнутий Фивайдский, Павел Неокесарийский, Афанасий Александрийский и прочие исповедницы Христовы, иже свыше умудрившася, изложив тамо Символ веры и всей Церкви узакониша пети Троицу Единосущную, принесше песнь благодарения верховному Владыце всех Богу и сослужителю своему взывая: Радуйся, достойный сыне матере своя богомудрая Елены; радуйся, подражавый ей во смирении неизреченно. Радуйся, царю, превосходяй мудрость Соломона; радуйся, стяжавый веру праотца Авраама. Радуйся, законов и власти высокий архитектоне; радуйся, новый апостоле великаго града Константинополя. Радуйся, милостивый и кроткий повелителю; радуйся, перваго Никейскаго собора мудрый председателю. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 10

Спастися хотящим в подвизе девства, не возбранял еси, великий Константине, да чистым сердцем возносят молитвы Единому Богу о мире у всего мира и, отрешении молвы житейския, яко Ангелы поют: Аллилуиа.

Икос 10

Стена, покров и защита бысть тебе во всем Сама Пречистая Дева, Владычица неба и земли. Ейже вручил еси новый град твой на берегах Босфора, да вси людие, укрепляеми Ея милосердным заступлением, воспоминающе веру и подвиги твоя, прехвальне Константине, благоумиленно взывают: Радуйся, новую столицу Византии освятивый; радуйся, заступлению и покровительству Матере Божией вручивый. Радуйся, храм Божий во имя Ея создавый; радуйся, горячия молитвы в нем возславый. Радуйся, яко раб разумный таланты свои умноживый; радуйся, волю свою в волю Божию предавый. Радуйся, храмов святых украшение; радуйся, пастырей Церкви Христовы вразумление. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 11

Пения и усердная молитвы приносяще ныне во храме вашем, святии равноапостольнии царие Константине и Елено, просим со слезами: воздежите блаженнии ваши руце, имиже приясте Крест Святой, и молитесь распятого на нем Господа, да в покаянии непрестанно зовем Ему: Аллилуиа.

Икос 11

Светла и радостна кончина ваша, святии равноапостольнии Константине и Елено, вы бо победоносное знамение в объятиях своих держаще, покажете сим, да возмет кийждо Крест свой и, во смирении шествуя путь земнаго странствия, сподобится получить безболезненную кончину и Божественных Тайн причащение, со слезами взывая вам: Радуйтесь, яко поете Ему со Ангелы Трисвятое пение; радуйтесь, с собором апостолов Ему предстоите. Радуйтесь, яко вкупе со всеми святыми райская селения зрите; радуйтесь бедных и убогих милостивии попечителие. Радуйтесь, от уз и пленения скорые свободителие; радуйтесь, праздника не почитающих строгие наказателие. Радуйтесь, о всех чтущих память вашу пред Господем предстателие. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 12

Благодать мира, тишину испросите притекающим к вашему заступлению, угодницы Божии, сохраните отечество наше от врагов находящих на ны и междоусобныя брани, да милость Божию улучим вашими молитвами, вопиюще со всеми святыми Владыце Христу: Аллилуиа.

Икос 12

Поюще и восхваляюще вас, святии равноапостольнии царие Константине и Елено, празднуем святую память вашу и просим: не забудьте нас, грешных, чтущих труды и подвиги ваша, да вси с верою и любовью зовем к Вам: Радуйтесь, града и храма сего покровителие; радуйтесь, пастырем Церкви богомудрии учителяе. Радуйтесь, во тьме заблудшим яркие светильницы; радуйтесь, за отечество наше теплые пред Богом молитвенники. Радуйтесь, яко больных, слепых и глухих исцеляете; радуйтесь, яко от нечаянных смерти избавляете. Радуйтесь, еретиков и хульников веры страхом правосудия Божия устрашаете; радуйтесь, грешникам кающимся прощения у Престола Божия испрошаете. Радуйтесь, святии равноапостольнии Константине и Елено, обретшии Крест Господень, оружие спасительное.

Кондак 13

О двоице премудрая, великие царие Константине и Елено, примите малое сие моление наше и приносимое вам хваление! Избавите чтущих святую память вашу от греховных страстей и вечнаго осуждения, да ходатайством вашим возможем до скончания дней своих поклоняться Животворящему Древу Креста Господня и тамо, идеже сияет свет невечерний, пети во славу Креста: Аллилуиа.

(Этот кондак читается трижды, затем икос 1 и кондак 1)